



Aduan WhatsApp digodam, Fahmi jumpa Meta minggu depan

Oleh Mohd Iskandar Ibrahim - Disember 7, 2023 @ 9:03pm
mohd_iskandar@bh.com.my

PUTRAJAYA: Menteri Komunikasi dan Digital, Fahmi Fadzil, akan mengadakan pertemuan dengan penyedia perkhidmatan telekomunikasi WhatsApp, Meta minggu depan, susulan kebimbangan orang awam berkaitan isu keselamatan siber di platform itu.

Beliau berkata, pihaknya menerima pelbagai aduan mendakwa akaun WhatsApp mereka digodam pihak tidak bertanggungjawab.

"Ini membimbangkan kerana sebelum ini ia membabitkan aplikasi Telegram, sekarang merebak ke WhatsApp dan saya secara peribadi menerima aduan daripada beberapa individu mengenai akaun mereka 'dicuri' pihak tidak bertanggungjawab.

"Cybersecurity sudah mengeluarkan amaran mengenai bahaya akaun WhatsApp akaun yang diambil alih (digodam) penjenayah," katanya.

Beliau ditemui selepas menghadiri Majlis Penutupan Jelajah Anti-Scam Kebangsaan 2023 peringkat Wilayah Persekutuan Putrajaya yang disempurnakan Timbalan Perdana Menteri, Datuk Seri Fadillah Yusof di sini, hari ini.

Fahmi berkata, pertemuan itu penting bagi mendapatkan penjelasan Meta mengenai ciri keselamatan aplikasi terbabit yang dilihat mudah dieksloitasi penjenayah.

Justeru, beliau mengingatkan orang ramai supaya sentiasa berwaspada dan tidak menekan pautan meragukan yang diterima di aplikasi terbabit sehingga menjadi mangsa penjenayah.

Terdahulu, CyberSecurity Malaysia mengeluarkan amaran berhubung aktiviti penyamaran melalui akaun WhatsApp dengan menipu mangsa untuk memindahkan wang.

CyberSecurity Malaysia dalam kenyataan di laman Facebook memaklumkan, berlaku penipuan menggunakan aplikasi itu dengan pelaku menyamar sebagai individu dikenali mangsa sebelum menghantar satu pautan dan meminta mangsa untuk klik pada pautan berkenaan.